

世補齋醫書 內經運氣病釋六

元和陸懋修九芝輯 潤庠鳳石參校

至真要大論篇

厥陰之勝

此言風木氣勝而土受制也

民病耳鳴頭眩憤憤欲吐胃脘如寒

此風木之動木邪傷胃胃虛如寒非真寒也乃水飲也

眩脇氣并化而爲熱小便黃赤

此肝邪盛而化熱侵及小腸也

胃脘當心而痛上支兩脇甚則嘔吐噎咽不通

此木盛克土而胃病也

腸鳴飧泄少腹痛注下赤白

此以胃大腸皆屬陽明足經病而手經亦病也

厥陰之勝治以甘清佐以苦辛以酸寫之

甘爲土味清爲金氣土金相生則木有制而土不受克矣
佐以苦辛苦爲火味以生土辛爲金味以制木木性條達
反其性而斂之故爲瀉

厥陰之復

此言木氣先受金制而旣乃復也

民病少腹堅滿裏急暴痛

此肝邪盛而氣急也

厥心痛汗發

此肝邪乘胃上陵於心而陽氣泄也

嘔吐飲食不入入而復出甚則入脾食痺而吐

此脾受肝傷故食入不化或入而氣閉不通吐出乃已也

筋骨掉眩清厥

此風氣盛而頭目顫運手足逆冷也

厥陰之復治以酸寒佐以甘辛以酸寫之以甘緩之

酸爲木味寒爲水氣木之正味其瀉以酸木火相生宜清

以寒也佐以甘辛者木盛土衰以甘補土辛從金化以辛

制木也酸寫甘緩皆木之正味而爲正治

少陰之勝

此言君火氣勝而金受制也

民病心下熱善饑齊下反動

此以少陰之脈起心中出屬心系下絡小腸而熱乘之也

氣游三焦嘔逆躁煩腹滿痛澹泄傳爲赤沃

此以熱盛包絡包絡之脈歷絡三焦而上中下俱病也赤

沃便血也

少陰之勝治以辛寒佐以苦鹹以甘寫之

辛爲金味寒爲水氣金水相生則火有制而金不傷佐以

苦鹹苦從火化以助其辛鹹從水化以助其寒也火性急速故以甘緩爲瀉

少陰之復

此言君火先受水制而旣乃復也

民病煥熱內作煩躁𩑦噫嗑燥少腹絞痛分注時止

此火炎上而在喉火陷下而居腎大腸分小便之水津而時止時作也

氣動於左上行於右欬暴瘡皮膚痛

此以肺主音聲外合皮毛而受火之傷也

心痛鬱冒不知人迺迺漸惡寒振慄譫妄

此心邪自實神明內亂熱極則生寒非真寒也

寒已而熱渴而欲飲少氣骨痠隔腸不便浮腫噦噫

此寒已而復見真熱也譫妄甚故少氣振慄甚故骨痠陰陽水火不交會於中土故氣阻而外內交病

痲疹瘡瘍癰疽瘰癧甚則入肺欬而鼻淵

此熱甚傷肺不外越於皮毛卽內入於肺經也

少陰之復治以鹹寒佐以苦辛以甘寫之以酸收之辛苦發之以鹹奠之

鹹爲水味寒爲水氣制以其所不勝也佐以苦辛發不遺熱也甘酸以瀉火而斂浮熱苦鹹以散火而解熱結

太陰之勝

此言溼土氣勝而水受制也

民病火氣內鬱瘡瘍於中流散於外

此以寒溼外甚則心火內鬱從中以達於皮膚之外也

病在肱脇甚則心痛

此謂其瘡瘍在肱脇之皮膚若不流散於外則毒歸於內

以心脈出於腋下而起於心中也

熱格頭痛喉痺項強

此謂熱勝而格於上也

獨勝則溼氣內鬱寒迫下焦痛留頂互引眉間頭重腰腫重

強

此謂無熱而溼獨勝也無熱則爲寒溼而下與太陽寒水氣合故其所病皆爲太陽經脈所行之路

胃滿少腹滿內不便善注泄足下溫足脛胫腫飲發於中胛腫於上

此則寒溼合病而滯於中下也飲發則水又與溼合而上行矣

太陰之勝治以鹹熱佐以辛甘以苦寫之

鹹爲水味熱爲火氣溼熱則以鹹化之寒溼則以熱治之溼勝則土寒辛能溫土甘能補土故佐以辛甘若溼勝而

土實則以苦瀉之土之正味其瀉以苦也

太陰之復

此言土氣先受木制而既乃復也

民病體重中滿食飲不化

此土邪盛而自傷同氣也

胸中不便飲發於中欬喘有聲

此陰氣上逆脾溼侵肺也

頭頂痛重而掉瘰尤甚

此溼在三陽筋脈濡奕也

嘔而密默唾吐清液

此寒溼內動也

甚則入腎竅寫無度

此土邪傳腎腎開竅於二陰而門戶不要水泉不藏也

太陰之復治以苦熱佐以酸辛以苦寫之燥之泄之

苦爲火味熱爲火氣苦瀉土熱燥溼也佐以酸辛者惟木
生火火不足則佐以酸惟金生水火太過則佐以辛也土
位之主其瀉以苦瀉以奪其實燥以勝其溼泄以利其水
也

少陽之勝

此言相火氣勝而金受制也

民病熱客於胃煩心心痛目赤欲嘔嘔酸耳痛

此客熱行於上焦故所見病多在上也

善飢善驚譫妄

此客熱行於中焦而火盛傷陰也

少腹痛溺赤下沃赤白

此客熱行於下焦也赤白有氣血之分大便曰利小便曰

濁

少陽之勝治以辛寒佐以甘鹹以甘寫之

辛爲金味寒爲水氣金水相生則火有制而金不傷佐以
甘鹹甘能瀉火鹹能泄熱也以甘瀉之者甘能除大熱也

少陽之復

此言相火先受水制而既乃復也

民病驚瘵欬衄心熱煩躁便數憎風

此火乘心肺表裏交熱也

面如浮埃目眴瞶瘵上爲口糜嘔逆血溢血泄

此厥氣上行火氣內發故形色變而逼血妄行也

發而爲瘧惡寒鼓慄嗑絡焦槁渴引水漿少氣脈萎

此風火相薄陰陽相并寒極而熱津液涸氣血傷也

色變黃赤化而爲水傳爲肘腫

此氣蒸熱化水道不通故溺色變而浮腫如泥也

甚則入肺欬而血泄

此以火盛克金而血溢於肺也

少陽之復治以鹹冷佐以苦辛以鹹寒之以酸收之辛苦發之

鹹爲水味冷爲水氣制以所不勝也佐以苦辛發散其熱苦從火化火氣虛則佐以苦辛從金化火氣盛則佐以辛而又必鹹寒以解熱之結酸收以斂熱之浮辛苦發之所以申發不遠熱毋犯寒涼之意也當與少陰參看

陽明之勝

此言燥金氣勝而木受制也

民病清發於中左脇痛澹泄

此金盛木鬱而清邪陷於下也

內爲噎塞外發癰疽

此肝木受病而清氣上下行也

胸中不便噎塞而欬

此以燥勝則肺氣斂而失其治節也胸中肺之所居

陽明之勝治以酸溫佐以辛甘以苦泄之

酸爲木味溫爲火氣木火相生則金有制而木不傷陽明有燥金之氣有清金之氣燥氣而有餘則辛以散之清氣而不足則甘以滋之苦從火化能泄其燥邪也

陽明之復

此言金氣先受火制而既乃復也

民病生肱脇氣歸於左善太息

此金氣盛而肝傷則木爲之鬱肝陽不升膽亦病也

甚則心痛否滿腹脹而泄嘔苦欬噦煩心病在鬲中

此清氣太過陽明氣逆心胃生寒而皆病也

頭痛甚則入肝驚駭筋攣

此金氣乘肝也厥陰肝脈上額與督脈會於巔

陽明之復治以辛溫佐以苦甘以苦泄之以苦下之以酸補之

辛爲金味溫爲火氣瀉金以辛勝清以溫也苦以制金甘以生金故佐以苦甘而又苦泄以開燥結酸補以斂津液下亦泄也

太陽之勝

此言寒水氣勝而心受制也

民病痔瘡發

此以太陽經脈貫膈故痔發以邪正分爭而寒熱互作故瘡發皆寒勝火鬱之病也

寒厥入胃內生心痛

此寒入胃胃脘當心而痛胃脘在心下故曰心痛